

1 JONI

1 Jonido Vua Amure

Fasi ige Joni fune e orema ijia fu are Efesasi ijia fina isoena e ije ma vierafevo are Esia guove ijia karivo ije nijiae. Joni fu vua inokiro vieraferma ijadufuo fu fasi ige isoe. Vua amure ije fu e Jesu ma vierafermo ije soesoega bu goriesana Godikiro Fari fuone Jesu Kuraesi ije buosukua vierafermo fu ije isoe. Ro bune ude Godi oetuavo ijadufuo fu vierafermo bu buone oetuanamikuva fuka mareke. Ro vua be ije fu e ije vua kufui nijasianoejo ijiebuo ju kuariae. Ro e gue bu Jesu fu ma Godido Fari ije bu naebe vierafermo. Ijadufuo fu fasi ige isoena e Godi ma vierafermo ije nijiana kia, Jesu Kuraesi fu ma Godido Fari ijneneno kiae.

Jonido vua binobino fu isoema ijeja -

- 1:1-4 Joni fu vua fuone zinuivena kuaema ijene.
1:5-2:29 Godido vame sanaema ijiajiroro Setanido vame titutema ijene.
3:1-24 Godido anafa ije bu izege karinodufuo ijene.
4:1-6 E ije vua bu kuaevu ije kena mazie giaga bu Godido kuaevu ro bu
Setanido vua kuaevu ije giadufuo ijene.
4:7-5:21 Kavene ise kufui ijiebuo vua binobino ijiajiroro Godido oetuamo
ijiajiroro no izege Setani asidufuo ijiajiroro vame ma karivako
ijadufuo vua ijene.
-

Ma karivako ijadufuo vua ijene

1 ¹Fasi ige no isoena naejiavo ijeja no vua ije ma karivako ijadufuo ijene isoena naejiave. Ro E Ije vua ma karivako ije abe ruaema ije fune isuive aesakae ige bu naebe amaeriva ijia Godiki besu fi ruae. Ro E Ije no vua fuone abe oenoejo ije no vua fuone ije none fie ro kuke none ni nuvuone igia fu gae. Ro ije fuka ma none ni nuvuone ijia gakinu ro vajae fuone none umui nuvuone ijia farena gae. ²Ro E Ije fu vua ije ma karivako ijadufuo vua ije fune abena e boegiebuo nidua ijia romoga none gae. Ijadufuo no vua fuone abena e boeje kuarianoekinu ro ja kuariave. No ijiege kuariaga ja vua ijene mukoreigia fiena vierafermo E Ije fu vua ma karivako ije abe ruaema ije fune isuive Asoe fuone ijiajiroro fina ruae. Ro iviama fu nuvuone ruaemaro ja ijiege vierafermo. ³Ijadufuo no irere

no giakinu fieva no ijene abena ja kuariave. No ijiege kuariaga ja fiena roga no besu afuina una Asoe nuvuone ijiakiro Fari fuone Jesu Kuraesi ijena besu goruvekinu karivake. ⁴Ro vua ige no isoena ja nijiavo ijadufuo maeje ja vua ijia dana oemarekinu karinoeke. Ro kuke no izeve ije ja oemarevo ije fiekuva nodua noka ijiege oemarekinu karinoedufuo.

Godi fuka sanaema ijene

⁵Ro vua ige no nijasiavo ije no Godido Fari ijare kuaruema no ijene abena ja kuariave. Godi fuje fuka sanaema ijene ro are iziebure fu fino ije fuka sanaema ijiaru ro titutema ije ja ijia gakuva baki. ⁶Ro no kuae noeje no Godina agane besuno kuae rove vua nuvuone no kuaevo ijiakiro nuvuone no kenoevo ije no uria titutema ijia kenoejogakuva ije noka e iti kufuiki. ⁷Ro no maza boeje ijiege Godi fu sanaema ro fu fino ijiege kari vakuva ije none una besu goruvekinu karinoeve. Ro kuke Fari fuone Jesudo kavuane ije fu ise nuvuone boeje no renoejo ije soejuokinu karaunuome.

⁸Ro no kuae no ise bino renoejo bakino kuaekuva ije noka kufuimeve. Ro kuke vua maeje fu oe nuvuone ijia namo baki. ⁹Ro no ise nuvuone boeje no renoejo ije Godi kuarakuva fuje fuka naenitua ma renoeno ijadufuo fure ise nuvuone boeje guona areke. Ro kuke fu vame ise no renoejo ije fikorejuoke. ¹⁰Ro no kuae no ise renoejo bakino kuaekuva ije noka Godi dabe kufui igege kuaenoeve. Ro kuke vua fuone fu oe nuvuone ijia namo baki.

E ije no ifejuomo ije Jesu Kuraesi

2 ¹Na fasi ige isoena anafa none boeje ja nijiaga vua ije fu ja ifejiaga jabe ise bino renoeke. Ro eranebe bu mamona ise renoekuva Jesu Kuraesi e ije maturaema ije fu nuvueluo Asoe nuvuone ije kuaramo ijadufuo fu ise nuvuone guona areke. ²Ijadufuo maeje Jesu fu ise nuvuone ijiakiro e boeje are ireo igia karinoeva ijiebuo ise ijadufuo baronei.

³Ro no Godido akae boeje fu kuaruema ije mukoreigia fiena renoekuva ije no vierafero none ma fu vieraferovo no ijiege vierafero. ⁴Ro e be fu kuae fu Godi ma vieraferomo kuae rove akae fuone ije fu naebe mukoreigia vieraferokuma e ije fuka kufuimene. ⁵⁻⁶Ro erare fu vua fuone mukoreigia fiena renoekuma fuone izeve fu Godi oetuamo ije fuka ma ireobo rena vake. Ro erare fu kuae fu Godiki finoeno kuaekuma e ije fuka Jesu Kuraesi fu fivaema ijiege finoeke. Ro fu ijiege finoekuma no ma vierafero fuka Godiki finoenor no ijiege vierafero.

Godido vame iviaecko ijene

⁷Ro kairafano, vua ige na isoe nijiavo ije fu iviaecko baki ro vua ije fuka isuiko. Ro vua ije bune isuibe nijasiavo jane fiena raeaiva ijene. ⁸Rove

na una kuke vua iviaecko be isoena nijiave. Ro vua ijadufuo maeje fune Jesu Kuraesire renoeno jane gae ro kuke jane koejo mimatana renoeve. Ijadufuo titutema ije fune bakirevakoga sanaema ije fune no kariva ijia saname.

⁹Ro erare oenoeno kuaeko fuje fu sanaema ijia finoeno kuaenaro fu una kai fuone be ziegafamo e ije fuka uria titutema ijia finoene. ¹⁰Ro kuke erare fu kai fuone mukore oetuakuma e ije fuje fu sanaema ijia oenoene. Ro kuke fu ise bino oe fuone navo baki ijadufuo fube kairafa bino arafiriaga bu ise reke. ¹¹Ro erare fu kairafa fuone maza boeje ziegafiamo ije fuje fuka uria titutema ijia finoene. Ijadufuo maeje ni fuone ije fune titutema ijare mukoreigia okuraema ijadufuo fu izege rerekiru oenoekuma baki.

Vua iviaecko ijadufuo ubine ijene

¹²Ro anafa none na oetuavo ige, fasi ige na isoena nijiavo ijadufuo maeje ise jone boeje fune Jesu Kuraesire joefuo baronena fune abe vae.

¹³Ro asoerafa none boegie fasi ige na isoena nijiavo ijadufuo maeje E Ije fune romo jane gae. Ro jane mukoreigia vierafege fuje fune iko zinume ijia Godiki fina ruae. Ro e nikaki boegie fasi ige na isoena nijiavo ijadufuo maeje ja Setani jane jare iraraena asi. Ro anafa none na oetuavo ige fasi ige na isoena nijiavo ijadufuo maeje Asoe jone ije jane mukoe vierafei. ¹⁴Ro asoerafa none igie, fasi ige na isoe nijiavo ijadufuo maeje E Ije fu isuibe Godiki fima ije fune romo jane gana vierafei. Ro e nikaki igie fasi ige na isoe nijiavo ijadufuo maeje jaeje jaka e daroki. Ro Godido vua ije fune oe jone ijia namo ijadufuo Setani jane dabe garege akoe.

Ume igadufuo vame jade oetuavo ijene

¹⁵Ro ume igiakiro ire bino ume igia naovo ije jade uruvana oetuavo. Ja ume igadufuo sinuome ije uruke oetuavo ije ja Godi mukoreigia oetuavo baki. ¹⁶Ijadufuo maeje ire isekuma boeje ume igia naovo ije bu Godido ruovo baki. Ro ire ijeja vame ije barabaru oenoeko ije uruke vierafenoeko ijiakina ire ije no niome igia giana ireobo vierafevo ijene. Ro kuke vame izege no sinuome binobino kevo ijadufuo aroekaravo ijene. Ro ire ije bu Godido ruovo baki ro bume ire bino bu ume igia naovo ijene. ¹⁷Ume igiakiro ire boege bu ume igia noaga e bu giana oetuavo ije rade buka bakireke. Ro erare fu irere Godi fu vierafema ijiaru renoeno ije fu maza boeje ijia fivake.

E ije Jesuna nigaraevo ijiebuo vua ijene

¹⁸Anafa none igie, maza ije Jesu Kuraesi fu una ruadufuo ije fune ivuareme. Ro bune isuibe kuariana kia, E ije Jesuki nigaraenoeno ije fu una ruakono kiae. Ro iviama e ijieki ije buneka boeje samadirevo

no giae. Ijadufuo no viera fega maza ije fune ivuareme. ¹⁹E ije Jesuna nigaraenoejo ije bu naebe noena agane besu rena oeno evo ijadufuo bune no unuona vae. Ro bu noena oe besu revabitie bu uria noena karinoeve. Ro bune no arena vaeva ijadufuo none giana viera fega bu noena oe besu viera fevo baki.

²⁰Ro jaeje fune Jesure Godido Kavene ije kena uniae jiae ijadufuo ja vua ma ijiaru viera feno eve. ²¹Ro fasi ige na isoe nijiavo ije ja vua maeje naebe viera feva ijadufuo na ije isoe nijiavo baki. Ro na viera fega vua maeje Jane mukoreigia fiena viera fei. Ro kuke Jane viera fega vua kufui ije fu Godido ruomo baki.

²²Ro e ije vua kufuimeno evo ije e ije eranebe? Ro e ije ja e ije fu kuae Jesu fu ma Godido ruaema bakino kuaemo e ijare e iti kufuiki. Ro kuke fure ijiege renoeno ijadufuo fu Asoe nuvuone ijiakiro Fari fuone Jesu fu giana ijuoneme. ²³Ro erare fu Fari fuone ije ijuonemo e ije fu kuke Godi Asoe fuone ije ijuoneme. Ro erare fu Fari fuone mukoreigia oetuana mesirimo ije fu kuke Asoe fuone ije oetuana mesirime.

²⁴Ro ni vua ije ja iko zinume ijia fiena ruaeva ije mukoreigia oe jone ijia viera feno efo. Ja vua ije mukoreigia oe jone ijia viera feno kuva ja Jesukiro Asoe fuone ijena agane besu rena karinoeke. ²⁵Ro Jesu Kuraesi fu korofuo vua maeje abena no muokono kue. Ro ire ije fu abe muoko kuema ije ja vame ma karivako ije abena muoke.

²⁶Ro vua ige na isoe nijiavo ije ja na e ije bu vua kufuimena nijasiavo ije buka ja kaenamiana una vame ise ijia vakuvejo na ijadufuo isoena nijiave. ²⁷Rove igia fie, jaeje fune Kuraesire Kavene fuone ije kena oe jone ijia uniae jiae. Ro maza ije Kavene fu oe jone ijia samuagiamo ijia e bino bube una ja nijasiadufuo. Ijadufuo maeje fune Kavene Akae ijare ire boeje nijasiame. Ro irere fu nijasiam ije fu kufui ije nijasiam baki ro fune vua maeje nijasiame. Ijadufuo ni vua ije fu nijasiam ije irinana Kuraesina besu karinoebo.

²⁸Ro anafa none na oetuavo ije nika Jesu ma viera fena fuina oeno efo. Ijadufuo maeje maza rade fu una ruomo ijia nome zinune jaeve baki uri fu bieke. ²⁹Ro Jane viera fega Jesu fuka vame ma ijiaru renoeno. Ijadufuo erare fu vame ma ijiaru renoeno ije ni viera fe e ije fune ma Godido fari.

No Godido anafa igege karinoedufuo ijene

3 ¹Ro ni Asoe nuvuone ije fu izege no oetuaema ije gafo! Fu no oetuaema ije fuka ma ireobo ijadufuo noeje fu kuo, Jaeje ja anafa noneno kue. Ro ije fuka ma noeje noka ma Godido anafa. Ro e ije bu ume igia ise renoejo ije bu Godi bu naebe mukoe viera fe. Ijadufuo noeje no anafa fuone ijiege bu naebe mukoe viera fei. ²Ijadufuo e kairafa none ma igie noeje none iviama Godido anafa rei. Ro rade no are fu fino ijia vakuva nobite e izeki redufuo ije noka naebe mukoe viera fei. Ro no

vierafega Jesu fu una ruakuma vajae nuvuone ije bu una fuone ijiege rega no gake. Ijadufuo maeje Jesu noka ni nuvuone ijia gake. ³Ro erare fu ma vierafero Jesu fu una ruakuvenoro fu ijiege vierafemo e ije fuka Jesu fu ma ijiaru renoeno fu ijiege renoeke.

⁴Ro erare fu ise renoeno ije fu Godido vierafe ijia renoevo baki. Ro kuke Godido akae ije fu aguaemo baki ijadufuo maza boeje fuka Godido akae ije kame tuaseme. ⁵Ro jane vierafe Jesu fu ruaema ije fu e ije ise renoejo ijiebuo ise ije abe vakiro ruea. Ro fuje fu ise bino renoema baki. ⁶Ro erare fu Jesuki maza boeje finoeno ije fube maza boeje ise reruke. Ro erare fu ise fu renoeno ije fu naebe aremo e ije Jesu fu naebe gae ro kuke fu fuosiki maza boeje finoeno baki.

⁷Ijadufuo anafa none igie ni koejo mukoreigia samuanamikinu oenoefo. Ro jade arega e ise binobe ja kaenamia una vame ise ijia vako. Ro erare fu vame ma ijiaru kenoeno e ije fuje fuka Jesu fu maturaema ijiege maturaeme. ⁸Ro erare fu ise renoeno e ije fuka Setanido e ijadufuo maeje Setani fu iko zinume ijia fu ise rena ruea. Ro Godido Fari ije fu irerefuo ume igia arina ruaema ije fu Setanido i ije dabe tuase garege akoekiro ruea.

⁹Ro erare fu Godido ame rekuma ije fube ise fu ude renoema ije renoeke. Ijadufuo maeje Godi fune kavene iviaeko ije abena e ije mae. Ro kuke fune una Godido ame redo fube una ise renoeke. ¹⁰Ro no izege Godido anafa ije no bino giakiro Setanido anafa ije no bino giadufuo vame ije ijiege. Erare fu naebe vame maeje ijia kenoekinu ro kairafa fuone fu naebe mukore oetuamo e ije fu Godido ame baki. Ijadufuo e ije fu ijiege renoejo ije fuje fu Setanido ame.

Vua oetuanamivo ijene

¹¹Ro vua iko zinume ijia ja fieva ije igene. Noka kairafa nuvuone ijena oetuanamike. ¹²Ro nobe e Keini fu kema ijiege renoeke. Fuje fuka Setanido e ijadufuo fu uvia fuone kanamo fu baronei. Ro Keini fu irerefuo uvia fuone kanamo fu barone? Ijadufuo maeje Keini vame fuone fu renoeno ije fuka ma ise. Ro uvia fuone fuka vame ma ijiaru renoenoga fu ijadufuo kanamo fu baronei.

¹³Ijadufuo uvilarafa none igie e ume igia ise renoejo ijiebe ja ziegafiakuva jade oeseradiavo. ¹⁴No kairafa nuvuone ijena oetuanamivo ijadufuo no vierafega no vame ise ije bu no kaenamu baromuna vako ije none arena una vame ma kari vako ijia ruea. Ro erare fu naebe kairafa fuone ije mukoreigia oetuamo ije fuje fu uria vame baromuna vako ijia vake. ¹⁵Ro erare fu kairafa fuone ziegafiamo ije fu e kanianoenog igeki. Ro e ije e kanianoenog ije fu vame ma kari vako ije fu naebe gae.

¹⁶Jesu fu nuviefuo baronema ijia none izege fu no oetuamo ije gae. Ijadufuo Godi fu vierafe nodua noka uri kairafa nuvuone ijiebuo oekuva fuka mareke. ¹⁷Ro e be fu sinuome uruvana kena finoekinu kuae fu Godi

mukoreigia oetuamono kuae. Rove fu naebe kai fuone be isema oenoeno ije ifejamo ije fuka Godi mukore oetuamo baki ro fuka kufuimenoene. ¹⁸Ijadufuo anafa none igie jade itire igia kuaeko ja kairafa jone oetuavono kuaovo. Ro nika uri vame ma ijia mukoreigia kenoekinu ro oe jone ijiakuma e ifejiafo.

¹⁹No kairafa nuvuone ijene ijiege mukoreigia ifejiakinu oetuakuva na vierafe none Jesu Kuraesido makae ije nuvena kenoeve. Ro kuke no Godido nidua ijia oemarekinu oenoke ro nobe fu gana jumeke. ²⁰Ro no vieraferga vame nuvuone no kenoejo ije fu isekuma ije Godi fudua fune vieraferga vame ije fuka ise. Ijadufuo maeje fu ire boeje no renoejo ije fune guona vierafermo. ²¹Ijadufuo erafano maegie ja vieraferga ja ire ise bino ja naebe rejoga nika dazena Godido nidua ijia vadufuo. ²²Godi fu irere no kuavo ije fuka vajuomo. Ijadufuo maeje no vua fuone ije noka mukoreigia iriniana ire ije fu oemaemo ijia renoeve. ²³Ro vua ije Godi fu no kuaruema ije fu kuo janika Fari none ije ma vieraferfo. Ro nika izege fu ude kuaruema ijiege rena kairafa jone mukoreigia oetuano kue. ²⁴Ro erare fu Godido vua ije mukoreigia fiena irinamo e ije fuka maza boeje Godiki finoekoro Godi fudua fu fuosiki finoene. Godi fune Kavene fuone kena no uniaejue ijadufuo no ma vieraferga Godi fune maza boeje noena finoene.

Kavene ma ijiakiro kavene ise ijiebuo vua ijene

4 ¹Kairafa none maegie ja e binobe oenoene biesiriana kiako, Noeje no kavene maeje abevano kiaga jade vua buone fiena ma vierafervo. Ro nine oenoekinu giaga kavene ije fune ma Godido ijare oe buone ijia fijoga ni ijare vua buone fiego. Ijadufuo maeje e boeje buka kufuimena oenoekinu kiavo, Noeje no ma Godido vua abe oenoevono kiavo. ²Ro ja vame izege e ije bu Godido kavene abeva ije giake? Ro vame ije ja izege giadufuo ije ijiege. Erare fu kuaeko Jesu Kuraesi fu Godido ruae ro fu ma emano kuaemo ije ni vierafero e ije fune ma Godido Kavene abemaro ijiege vieraferfo. ³Ro ja fiega bu kuaovo, Jesu fu ma ema bakino kuaevoga ni vierafero e ije bu kavene ise ije abevaro ijiege vieraferfo. Ijadufuo maeje vua buone bu kuaovo ije fu kavene ise ijare kuariaga bu ije kuaeve. Ijadufuo ja ijia vierafero e ije Jesuki nigaraenoeno ije fu ume igia ruakono kuaeva ije fune ruaemaro ja ijiege vieraferke. Ijadufuo fune kavene ise ijare e ijiebuo oe ijia ariga bu ije kuaovo, Jesu Kuraesi fu ma ema bakino kuaeve.

⁴Ro anafano jaeje jane Godido e rei ijadufuo jane jare e ije bu kufuimena Godido vua ije abe kuaenoevo ije iraraena asidiae. Ijadufuo maeje Kavene ije fu oe jone ijia jaena fino ije fuka ma daroki. Ro kavene be ije fu e ume igia ise renoejo ijena fino ije fuka daro baki. ⁵Ro e ije ume igia ise renoejo ije bu vua buone bu kuaenoevo ije bu ume igadufuo vua

ijene kuaenoeve. Bu ijiege kuaenokeke e ije ume igia ise renoejo ijiebe vua buone fieve. Ijadufuo maeje vierafe buone ije bu ume igadufuo ije kena kuaenoeve. ⁶Ro noeje no Godido e. Ijadufuo erare fu vua nuvuone ije mukore fiemo ije fuje fu Godido e. Ro erare fu vua nuvuone naebe mukoreigia fiemo e ije fu Godido e baki. Ijadufuo no ijiege renoekinu giaga kavene ize fu ma Godido ro ize fu kavene ise e biesiriamo no ije giake.

Godi fu oetuanamivo ijadufuo zinume ijene

⁷Kairafa none igie nika roga no nuvuone oetuanamifo ijadufuo maeje oetuanamivo ije fu Godido ruomo. Ro erare fu e gue oetuamo e ije fu ma Godido e ro kuke fu Godi mukoreigia vieraefemo. ⁸Godi fuka e oetuamo. Ijadufuo erare fu naebe kairafa fuone ije oetuamo e ije Godi fuka naebe gae. ⁹Ro Godi vame izege fu e oetuamo ije fu nijasuema ije fu Fari fuone besu ije kuamo fu ume igia ari ruea. Godi fu vierafero fu Fari fuone kuaga fu ume igia ari roga e ige no Fari fuone ije ma vieraferkuva no vame ma karivako ije abekiro fu ijadufuo ijiege rei. ¹⁰Ro oetuanamivo ijadufuo zinume maeje no nore Godi oetuaeva baki ro fune fure no mukoreigia oetuamo. Ijadufuo fu Fari fuone kuamo fu arina ise nuvuone ijadufuo zinone igege kurosi ijia baronei.

¹¹Ijadufuo kairafano Godi fu no ijiege mukoreigia oetuaejoga na vierafe nodua noka uri nuvuone oetuanamidufuo. ¹²Ro Godi fu erare gaema baki. Ro no nuvuone oetuanamikuva Godi fuka maza boeje oe nuvuone ijia finoike. Ro fu noena ijiege finoekuma fure ifejuomo ijadufuo nuvuone izege no e oetuavo ije fuka ireobo rena vase.

¹³Noka ma vieraferga Godi fu noena fino ro nodua no fuina karinoeve. Ijadufuo maeje fure Kavene Akae fuone kena no uniaejue. ¹⁴Ro kuke fu Fari fuone kuamo fu e boeje karauniakiro ume igia ari ruea. Fu ari romoga none konuvuo ni nuvuone ijia fu gae. Ijadufuo no vua fuone abena e boeje kuarianoeve. ¹⁵Ro erare fu kuaeko Jesu fu Godido farino kuaemo e ije fu maza boeje Godiki finoene ro Godi fu fuosiki finoene. ¹⁶No vieraferga Godido oetuamo ije fuka maza boeje noena navake ijadufuo noka oemarekinu karinoeve.

Ro Godi fuka e oetuamo. Ijadufuo erare fu kairafa fuone oetuamo e ije fu maza boeje Godiki finoene ro Godi fu fuosiki finoene. ¹⁷No Godi mukoreigia oetuakinu ro kairafa nuvuone ije oetuakuva no maza ije Godi fu fina e boeje ke mazie giamo ijia nobe fu gana jumeke. Ijadufuo maeje no Jesu Kuraesi izege fu ume igia oenoema no ijiege oenoeve. ¹⁸Ja Godi jone ije mukore oetuakuva jabe jumekinu oenoeve. Ijadufuo maeje ire boeje ja giana jumevo ije fune oetuamo jone ijare okuriaedo jabe una jumekinu oenoeve. Ijadufuo erare fu jumekinu oenoeno e ije Godi fu mukore oetuamo baki. Ro fume Godi izege fu e kena isekafiadufuo ijiaru vieraferoene.

¹⁹Ro Godi fune isuibe no oetuaema ijadufuo no ije kairafa nuvuone ijene oetuave. ²⁰Ro erare fu kuae fu Godi oetuamono kuae ro fu una kairafa fuone ije ziegafiamo ije fuka kufuimene. Fu kairafa fuone fune giamo ije fu naebe mukoreigia oetuakuma fu izege Godi ije fu naebe gaema ije mukoreigia oetuake? ²¹Ro Jesu Kuraesi no fu kuaruema ije fu kuo, Erare fu Godi oetuakuma nika kairafa fuone ije mukoreigia oetuano kue.

No Godi ma vieraferkuva no Setanido vame ije asidufuo ijene

5 ¹E be erare fu ma vierafero Jesu fu ma Godire kuamo fu ume igia e boeje karauniakiro ari ruaemaro fu ijiege vierafermo e ije fune ma Godido e. Ro erare fu Godi mukore oetuamo e ije fune kuke Fari fuone Jesu mukoreigia oetuame. ²Ro no vieraferga none Godi mukoreigia oetuakinu vua fuone boeje iriniavoga ije no vierafero none anafa fuone ijeduaku oetuave. ³⁻⁴Ro no Godido vua fuone boeje mukoreigia iriniakuva ije no vierafero none fu mukore oetuavoro no ijiege vieraferke. Ro vua fuone boeje fu kuaromo ije fuka gikikimana baki. Ijadufuo maeje eranebe bu Godido anafa revo ije bu manido bu vua fuone iriniana Setani ijuegafake. Ro no vierafero no Setanido vame ise fu biesiruomo ije iraraena asidufuo ije nokta Jesu ma vieraferke. ⁵Ro erare fu manido fu Setanido vame ije ijuegafake? Ro e ije fu ijiege redufuo ije fune e ije erare fu vierafero Jesu fu ma Godido Fariro fu ijiege vierafermo e ijare manido fu Setanido vame ije ijuegafadufuo.

Godi fu Jesudo vua maeje abe kuariaema ijene

⁶⁻⁷Kairafano vua ige na Jesu Kuraesido kuariaive. Jesu fu ume igia ari ruaema ije fu ire inokiro rei. Fu ire ije remoga no ijia gana vierafero fu ma Godido Fariro no ijiege vieraferi. Ro ire inokiro ije fu remo no giaeava be ije bu fu abe Godido ive ijia do ruoravo no gae. Ro be ije fu baronemoga kavuane fuone fu ume igia usiaemo none gae. Ro bu abe do ijiaru ruoraeva bakiro fu kuke kavuane fuone abe nuvueluo ume igia usiae. Ro vame ije fu kema ije fune Godido Kavene Akae ijare no kuaruona kuo, Jesu irere fu ume igia rema ije fune mano kue. ⁸No Godido Kavene ijiakina do ije Jesu fu ruema ijiakina kavuane fuone fu usiaema no ije giaeava ijadufuo no vieraferga Jesu fune ma Godido Fari. No ire inokubeke ije fu rema ije giavo ijia no ma vierafero Jesu fune ma Godido Fari. ⁹No e bino ijiebe Jesudo vua ije abe kuarovo no ije ma vieraferve. Ro no Godido vua ijare Jesusina kuaromo ije no fiega fuka ma daroki ijadufuo no vua fuone ma vieraferve. ¹⁰Ijadufuo erare fu vierafero Jesu fu Godido Fariro fu ijiege vierafermo e ije fune oe fuone ijia mukoreigia ma vieraferme. Ro erare fu Godido vua ije naebe mukoreigia fierna vierafermo ije Godi fuka dabe kufui igege vieraferme. Ijadufuo maeje

fu Godi vua ije fu Fari fuone ijadufuo kuaema ije fu naebe mukore fiena vierafema ijadufuo fu ijiege renoene.¹¹ Ro Godi fu kuaruema ije fu ijiege kuarue. Erare fu Fari none Jesu maza boeje ma vierafekinu fivakuma e ije fu vame makarivako ije abekono kue.¹² Ro kuke fu kuo, Erare Fari none abega fu fuosiki finoeno e ije fune vame ma karivako ije abene. Ro erare fu Fari none naebe abega fu fuosiki finoeno e ije fu vame ma karivako ije abeno baki.

Vame ma karivako ijadufuo vua ijene

¹³ Ro vua ige na isoe nijiavo jaka mukoreigia vierafero ja Godido Fari ijadufuo vame ma karivako ije jane abevaro ja ijiege vierafekiro na ijene isoe nijiave.¹⁴ Ro no ma vierafe no nidua fuone ijia baname isoena irere fu vierafema ije kuarakuva fuka fiena ifejuoke.¹⁵ Ro kuke no ma vierafero fu vua nuvuone boeje no kuaravo ije fune fiemoro no ijiege ma vierafekuva ije no vierafega fu ire boeje no kuaravo ije fu fiena vajuoke.

¹⁶ Ro erare fu gaga e kai fuone be fu ise be renal fune vame miane naeno ijia vakoga fuka fuefuo baname isoeke. Fu ijiege isoega Godi fu ise fuone gana aregaro ifejaga fu una vame ma karivako ije abedufuo. Ro erare fu Godi Asoe nuvuone ije mukoreigia ijuegafana Jesu Kuraesido kavuane fu fuefuo usiaema ije dabe omise igege vierafenoeno ije funeka una vame ise miane naeno ijia vake. Ijadufuo fu e ijieki ije fube fuefuo baname isoemo.¹⁷ Ro e ije ise boeje binobino bu renoevo ije buka Godido akae ije kame tuaseve. Rove ise gue bu renoevo ije bu vame ise miane naeno ijia vako baki.

¹⁸ Ro none vierafega erare fu una Godido fari remo ije fu maza boeje ise renoeno baki. Ijadufuo maeje e ije fune Godido Fari Jesure samuamo ijadufuo Setani fu e ije dabe vame ise ijia arafirimo baki.

¹⁹ Ro noeje none vierafega no Godido anafa. Ro e ije bu ume igia ise renoejo ije fu Setanire samuagiame.

²⁰ Ro fune Jesu Godido Fari ijare arina ume igia noena oenoekinu nijasuema ijadufuo no Godi ma vierafeve. Noeje no Godi ma ijiakiro Fari fuone Jesu Kuraesina karinoeve. Godi ije fu Godi ma ro fuje fu vame ma karivako ijene.

²¹ Ijadufuo erafano ige nika koejo mukoreigia samuanamikinu karinoefo. Ro jade uri ume igadufuo ire bino kame oe jone ijia uruvana vierafenoegaro Godi maeje ja dabe una ikene nijavo.